

Ich bin e Pälzer Bu (nach „Kölsche Jung“)

(Musik: Fritz Weber / Text: Günter Mannweiler)

1. Als kläner Bu do ging ich gern kassade,
hann Kersche gestränzt in Nachbars Gaade.
Ich hann die Hosse verriss, die Knie verfall,
emol e Zah verlor, das war egal.
In de Schul gab's alsemol was uff die Ohre,
do hann mei Eltere kä Wort driwwer verlore.
Hat mich e Fremder mol gefroot: Wer bisch dann du?
Do hann ich stolz gesaa: Jetzt hör mol zu!

Rerain:

Ich bin e Pälzer Bu, was kannsche mache?
Ich bin e Pälzer Bu und du gern lache.
Ich bin a sunscht net schlecht und jedefalls
hann ich mei Heimat gern, mei goldischi Palz!

2. Mer hann kä Ferseh gehatt, so war das ewe,
und ohne Handy konnte mer domols aa gut lewe.
Mer hann mitnanner gespielt und mitnanner gesproch.
Ich ging beim Nachbar in und aus so war das noch.
Und wann die Mamme owends mich ins Bett dann brachte,
was war der Bu so mied vum Tobe und vum Jachte.
Schunn kommt es Sandmännche, mei Auge fallen zu.
Ganz friedlich ohne Sorge schloft der Bu.

Refrain: Ich bin e Pälzer Bu, ...

3. Wann's dir mol dreckisch geht, dann lass de Kopp net hänge,
und wann dei Chef dich nervt, dann lass dich net so dränge!
Vergess es Lache net,
vergess net wie mer singt,
wie schää e Pälzer Lied
in Muttersproch erklingt.
Und stehsch du dann mol
vor de Himmelsforte,
dann red net viel und mach net so viel Worte.
De Petrus wääß genau, do steht e Pälzer Bu.
Sing nur dei Lied, die Engel hör'n all zu.

Refrain: Ich bin e Pälzer Bu, ...

